

**Unammilleqatigiinneq pillugu Inatsisartut Inatsisaata allanngortinnissaa pillugu
Inatsisartut Inatsisaat**

(Niuertarfinnik paasiniaaneq, immikkoortortamik misissuinerit, Unammilleqatigiinnermut Ataatsimiititaliap toqqaanera, taasinnermut maleruagassat ingerlasinnaassuserlu, suliffeqarfiup allagaatinik takunnissinnaanera, killigititamik unitsitsineq il.il.)

Nunanut allanut, Inuussutissarsiornermut Aatsitassanullu Naalakkersuisoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Juno Berthelsen, Naleraq, siulittaasup tullia
Inatsisartunut ilaasortaq Napaartoq Isak Petrussen, Demokraatit
Inatsisartunut ilaasortaq Vivian Motzfeldt, Demokraatit
Inatsisartunut ilaasortaq Aqqalu C. Jerimiassen, Atassut

UPA2026-mi ulloq 28. april siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Unammilleqatigiinnermut oqartussat atuisunut iluaqutaasumik unammilleqatigiinnermik sunniuteqarluartumik siuarsaasinnaaqullugit sakkussanik nutaanik tunineqarnissaat siunnersuutikkut pingaarnertut siunertarineqarpoq.

Allannguutit iliuusissallu uku siunnersuutip pingaarnertut imarai:

- Kattunnerit akuerineqarnissaannut killigititat pillugit malittarisassat allanngortinneqassapput, taamaalilluni unammilleqatigiinnermut oqartussat ilassutitut paasissutissanik pisariaqartitsilerpata killigititat pineqartut unitsinneqarsinnaaqullugit. Malittarisassat atuuttut kingunerisaannik assersuutigalugu paasissutissanik oqartussat

sulianik ingerlatsinerannut atugassanik suli katersisoqarnerani killigitat ingerlaannassapput.

- Siunnersuutip nutaatut imaraa inuussutissarsiorfiit aalajangersimasut niuernikkut paasiniaaffigalugillu misissuiffigineqarsinnaanerannut inatsisitigut tunngavissaq, tamatumani aamma unammilleqatigiinnermut inatsimmi malittarisassanik unioqutitsisoqarsimaneranik pasitsaassisoqarsimanngikkaluartorluunniit. Tassunga atatillugu Atuisartoqarnermut Unammilleqatigiinnermullu Aqutsisoqarfik pisariaqarpat iliuuseqarnissamik iliuuseqannginnissamilluunniit peqqusinissamut inatsisitigut tunngavissinneqassasoq siunnersuutigineqarpoq.
- Unammilleqatigiinnermi suliassat isertuunneqarnerullutik suliarineqarsinnaaqqullugit allagaatinik takunnissinnaaneq, aalajangikkanik tamanut saqqummiussisarneq aammalu inummut paasissutissanik suliarinnittarneq pillugit malittarisassanik iluarsineq.
- Unammilleqatigiinnermut ataatsimiititaliami aaqqissuusaanikkut pissutsit.

Siunnersuutip Inatsisartunit siullermeerneqarnera

Siunnersuut siullermeerneqarmat oqallisigilluarneqarpoq, tassungalu atatillugu sunniuteqarluartumik unammilleqatigiinnissap ataatsimut isigalugu pingaaruteqarnera aammalu inuussutissarsiortunut atuisunullu iluaqutaanissaa isumaqatigineqarpoq.

Unammilleqatigiinnermi oqartussat suliassatik akisussaaffitillu isumagisinnaaqqullugit eqqortunik sakkussaqalernissaat tapersorneqarpoq.

Aammali erseqqissaatigineqarpoq inatsit nunatsinni pissutsinut immikkut ittunut, tassungalu ilanngullugu niuerfiup pissusaanut unammilleqatigiinnermilu pissutsinut naleqqussagaasariaqartoq.

Kiisalu oqaatigineqarsinnaavoq Naleqqap tungaanit ilaatigut tikkuarneqarmat unammilleqatigiinnermut politikimi aallaavigineqartariaqartoq tassaamat taassuma kalaallinut iluaqutaanissaa. Peqatigisaanillu nunatsinni innuttaasut inuussutissarsiummik ingerlatsinissamut aammalu imminut pilersomerulernissamut periarfissaat nukittorsarneqartariaqarput.

Naalakkersuisut allakkatigut akissutaat

Siunnersuutip siullermeerneqarnerani Siumumit Naleqqamillu apeqqutigineqartunut Naalakkersuisut allakkatigut akissutaat ataatsimiititaliamit e-mailikkut 28. maj 2026-meersukkut tiguneqarput, tak. ilanngussaq 1.

Siunnersuut nunatsinni pissutsinut immikkut ittunut tulluarsagaasimanersoq pillugu Siumup oqaaseqarnermini ernumassuteqarluni oqaatigisaanut atatillugu ima allassimavoq: *”Ilisimatitsissutigissavara, Naalakkersuisut aaqqissuusaanikkut pissutsit immikkuullarissut,*

niuerfitsinni unammilleqatigiinnermut periarfissanut killiliisinnaasut, eqqumaffigimmassuk. Taamaattumik ilaatigut siunnersuutigineqarpoq, unammilleqatigiinnermi oqartussaasut niuerfínnik misissuinnermi sakkut nutaat atorlugit pissutsinik taamaattunik misissuisinnaassallunilu naleqqussaasinnaanissaa.”

Kiisalu apeqqutit ernummatillu aalajangersimasut akissuteqaammi isummerfigineqarput:

- Nunatsinni pissutsinut naleqqussaaneq pillugu
- Taaguummumut "niuerfínnik misissuineq"-mut tunngatillugu aamma politiinit misissortinnermut assigiinngissusaa
- Atuisartoqarnermut Unammilleqatigiinnermullu Aqutsisoqarfiup nakkutilliinnermut aamma atuutsitsinnermut piginnaasaanut tunngatillugu
- Suliffeqarfiit inatsisitigut isumannaatsuunissai pillugit
- Unammilleqatigiinnermut ataatsimiititaliap atuuffia pillugu
- Siunnersuutip Atuisartoqarnermut Unammilleqatigiinnermullu Aqutsisoqarfimmut aningaasatigut kinguneqartitsinissaa pillugu
- Iluanaaruteqarneq pillugu inatsimmut isumaliutit pillugit
- Atuisartunut siunnersuisartoqatigiit sumiiffimmilu atuisartunut ataatsimiititaliat pillugit
- Grønlandsbanken A/S-imiit tusarniaanermut akissuteqaat pillugu

Akissutit taakku siunnersuummik suliarinninnermi ilanngunneqartut ataatsimiititaliamit maluginiarneqarput.

Siunnersuutip aningaasaqarnikkut kingunerisassai

Siunnersuummut nassuiaatit malillugit siunnersuut pisortanut immikkut aningaasartuuteqarfiusussat naatsorsuutigineqanngilaq. Tassunga atatillugu paasissutissiissutigineqarpoq ingerlatat Atuisartoqarnermut Unammilleqatigiinnermullu Aqutsisoqarfimmut aningaasaliissutaareersut iluini akilerneqarsinnaanerit naatsorsuutigineqartoq, tassa aqutsisoqarfiup ingerlataasa tamarmiusut annertusineqarnissaat siunertaanngimmat.

Kiisalu siunnersuut inuussutissarsiortunut aningaasaqarnikkut annertuumik kinguneqartussatut naatsorsuutigineqanngitsoq allassimavoq. Siunnersuutip ilaa niuerfínnik paasiniaanissamut immikkoortunillu misissuinissamut tunngassutilik inuussutissarsiortunut allaffissornikkut killilimmik kinguneqarsinnaavoq.

Nassuiaatit malillugit siunnersuutip niuffaffimmik ingerlalluartumik unammilleqatigiinnermillu sunniteqarluartumik tapersuinera atugassiissutinik

atuilluarnerulersitsilluni, siunissami inuussutissarsiornermi pitsaasumik toqqaannanngitsumillu kinguneqartitsisinnaavoq.

Tusarniaanermut akissutit

Siunnersuut piffissami ulloq 21. november 2025-mit ulloq 15. december 2025-mut tusarniaaffigisanut assigiinngitsorpasuarut tusarniutigineqarpoq, tak. tusarniaanermut allakkiaq.

Tamatuma saniatigut inatsisissatut siunnersuut piffissami tassani tusarniaanernut nittartakkami www.naalackersuisut.gl-imi pisortatigoortumik tusarniutigineqarpoq.

Oqartussanit, kattuffinnit il.il. kinguliani allassimasunit tusarniaanermut akissutit tiguneqarput:

Naalackersuisut Siulittaasuata Naalackersuisoqarfia, SIK, Nalik Ventures, Kommuneqarfik Sermersooq, Sulisitsisut aammalu Grønlandsbanken.

Sulisitsisut tusarniaanermut akissutaanni ilaatitut ima allassimasoqartoq ataatsimiititaliamit maluginiarneqarpoq:

”Niuerfinnik misissuisoqarsinnaaneranut periarfissaqarneratigut, inuiaqatigiinni sunniuteqarluartumik unammilleqatigiinnerup siuarsarnissaata ukkatarineqarnera, tamatumunngalu pissusilersuut unammilleqatigiinneq pillugu inatsisinut toqqaannartumik unioqutitsinertut nalilerneqanngikkaluartoq peqqussutiliortoqarsinnaaneralu Sulisitsisut (Grønlands Erhverv) pitsaasutut isigaa.”

Tusarniaanermut allakkiamik suliaqartoqarsimasoq ataatsimiititaliamit maluginiarneqarpoq, tassani tusarniaanermut akissutit tiguneqartut naammattumik sammineqarput.

Ataatsimiititaliap siunnersuummik suliarinninnera

Niuerfimmik ingerlalluurtumik peqarneq inuussutissarsiortunut atuisunullu aalajangiisuusumik pingaaruteqartoq, tamatumani unammilleqatigiinnermi oqartussat eqqortunik sakkussaqarnissaat pisariaqartoq ataatsimiititaliamit oqaatigineqassaaq.

Inatsit tunngavissallu nunatsinni pissutsinut immikkut ittunut, tassungalu ilanngullugu niuerfiup annertussusianut nunattalu sananeqaataanut naleqqussarneqarsimassasut ataatsimiititaliaq isumaqarpoq. Tamannarpiarlumi pissutigalugu unammilleqatigiinnermut patajaatsumik inatsiseqarnissaq pisariaqartinneqarpoq, taamaaliornikkut unammilleqatigiinneq pitsaasoq atuisunullu akit pitsaasut qulakkeerneqarsinnaaqqullugit.

Kattunnermut suliassaqarfiup iluani killiliussat pillugit malittarisassat siunnersuutikkut allanngortinniarneqartut ataatsimiititaliamit maluginiarneqarpoq, taamaalilluni oqartussat paasissutissanik sulianik ingerlatsinerminnut atugassanik katersinissamik pisariaqartitsinerat ilanngullugu eqqarsaatigineqarluni.

Niuerfimmik immikkoortunillu misissuinerit pillugit aalajangersakkat unammilleqatigiinnermik sunniuteqarluartumik atuisunullu akinik pitsaasunik qulakkeerinninniarnermi sakkussatut pitsaasutut ataatsimiititaliamit isumaqarfigineqarput.

Tassunga atatillugu ataatsimiititaliamit maluginiarneqarpoq iliuseqarnissamik iliuseqannginnissamilluunniit peqqussutit siunnersuutip imarisai siumut isigisuusut aammalu pinerluttulerinermi inatsisit malillugit pineqaatissiissutit pineqanngitsut, naak malinneqanngippata unammilleqatigiinnermut inatsit naapertorlugu akiliisitsinikkut eqqartuussivikkoortumik soorunami kinguneqartinneqarsinnaagaluartut.

Oqaaseq "misissuineq" politiinut attuumassuteqartumik aamma atorneqartarmat taaguutip "niuerfimmik misissuineq"-rup allanngortinnissaa ammaffigigitsik Naalakkersuisut allattut ataatsimiititaliamit maluginiarneqarpoq, tak. ilanngussaq 1-imi akissuteqaat.

Tamanut ammatitsineq, allagaatinik takunnissinnaaneq aamma inummut paasissutissanik suliarinninneq pillugit malittarisassanik iluarsinerit erseqqissaanerillu arlallit siunnersuutip imarimmagat ataatsimiititaliamit oqaatigineqassaaq.

Unammilleqatigiinnermut suliassaqarfimmi malittarisassat allaffissornikkut aaqqissuussaanikkullu nutarterneqarlutillu iluarsineqarnissaat siunnersuutigineqartoq ataatsimiititaliamit maluginiarneqarpoq, taakkunungalu assersuutigalugu ilaavoq Unammilleqatigiinnermut ataatsimiititaliap atuuffia.

Ataatsimiititaliap inassuteqaatai

Siunnersuut akuerineqassasoq ataatsimiititaliami amerlanerussuteqartunit Demokratinit, Inuit Ataqtiginnit Atassummiillu inassutigineqarpoq.

Ataatsimiititaliap taama oqaaseqaateqarluni isumaliutissiissummilu allassimasutut paasinnil-
luni siunnersuut aappassaaniigassanngortippaa.

Mimi Karlsen
Siulittaasoq

Juno Berthelsen
Siulittaasup tullia

Napaartoq Isak Petrussen

Aqqalu C. Jerimiassen

Vivian Motzfeldt